

珂

雪

叅

外

集

珂雪外集卷之十一

公安鳧隱袁中道著

游居柿錄

萬曆丙辰正月初一日寓鐵匠衢術三元菴雪
大作京師是日老幼俱以彩作蝴蝶着頭上
密雲門人劉秀才啟元來丁未予館密雲蹇大
司馬所啟元同蹇公幼子授業

僧雅菴法孫果疑來晤果疑千戶侯子少喜空

玉皇山志卷之二
門從雅菴落髮後其家無嗣復還襲職訊之
則云官卑祿薄聊念先世恩胤不欲墜之耳
予以宗祀亦重如此權宐佛所許可又云
世宗朝五鳳樓灾借文武官半俸度支後事
竣文官得復而武職僅止半俸亦異聞也
十一日移居東城楊都尉空宅都尉好文藻遣
人致酒米

過燈市見米元章天馬賦卽非親筆亦臨筆之
最佳者傍有客曰字跡甚佳而紙類元紙予

曰使元有此人則其名詎出趙王孫下乎寔
可寶也有花觚一寶是漢物

上元日寓舉場月明與汪生步燈市復騎馬至
慕盤街是日都門士女皆至西華門上以手
捫門上銅釘後至前門走橋徹夜不休

天復雪中郎秦中門生送石刻二一爲聖教序
一爲顏魯公西京千福寺多寶佛塔感應碑
文建塔僧法彌楚金姓程廣平人天寶年間
造多寶塔行法華懺前後道場感舍利凡三

千七十顆後葬舍利復建道場又降一百八粒盡普賢變于筆鋒上連得一十九粒莫不圓滿自動浮光瑩然其事甚奇碑文岑勛撰魯公書徐浩題額

往禮部投謫卷于書肆得伯脩白蘇益善本細看之亦自清新道媚可傳也獨所作詩餘及襍戲數齣無一字存于世者可爲浩嘆

自二月初一日爲始身中頗有煩火自忖不知可入場否端坐以俟之

初七日雪里弟同來寓所候入塲

初八日雨大作往年塲中點名時爭門而入多有推排倒地踐踏歿者遂以是日午後前至點所候之坐一廡下雜廝役中頭稍前則兩滴其鼻至二漏點入

初九日塲中至初十日鷄鳴時始出門外接者擁塞不得行久之推排衆中或空行數步幾仆始得出復不見從者徒步泥濘中萬苦乃達寓

十三日天霽二場

十五日三場畢倦極

從楊都尉宅中移過西玄帝廟西廊與友人李
素心鄰三場已畢一身憊極第與不第不可
知思了此一局或仕或隱當別有計也

自此日爲始赴席匆匆不暇書

二月廿七日放榜候報久不至日已升得中式
捷音予奔波場屋多年今歲不堪其苦至是
始脫經生之債亦甚快但念老父及兩兄皆

不及見不覺爲之淚下午至鴻臚寺報名習
禮始知出書四房兵部郎歸安茅先生之門
同年中舊相知者皆來聚譚

廿八日黎明謝恩往本房座主處投帖午至
禮部迎大座師赴宴雨大至歸寓

廿九日早投大座師帖投本房師帖坐宣城伯
園樓上見西山一帶雪色照人午同年聚射
所往請大座師晤見之期晚赴李開府約于
魏戚畹園封公在焉招名劇演珊瑚記

大京兆李夢白以字來云聞兄得第家中兒女
皆喜兄其識之此後來一段佳話也

澤州張戶部聚垣名光奎兄石松先生予鄉試
本房師也聚垣曰家兄見兄久不第殊不快
得此信喜可知矣留寓中夜話

謝耳伯諸公大會于苗氏園予以其爲名理也
撥冗赴之及至寂然遂行

李夢白長公李百藥來百藥有才氣相與論宋
元人詩百藥極賞方秋崖檢新安所刻宋元

人詩止存其名稍暇當從百藥借讀也

十二日授廷試卷過東拜客往謁李光祿景頴
到門云已下世矣李名僚嘉魚人舉己丑進
士爲人清素自守且通性命之學臨去堅持
正念了無兒女子態累官光祿寺卿得年僅
五十七

張戶部廬中秘招飲于馮侍中寶故第危樓盡
閣美箭奇花可想見當日之盛也演劇者皆
顧李太史及中郎兄舊伶俱皤然有老態矣

爲之一慨是日得新安所刻宋元人詩尚未
全

自開榜後議者謂榜首文字全襲舊且與第六
名文雷同謂有隱弊宜覆試及覆試不能成
文臺諫交章論之遂不得與 廷試而兩座
師皆閉門不出

十五日 廷試當事者以賈元之弊防閑甚嚴
暴烈日中饑渴并至立窮則跪跪久復立墨
旣易燥又防其滲日西始竣平日作書多作

行書草書大書至于憲下作課皆令人代筆
謄錄是日作楷書甚窘

得丘長孺遼中書寄詩云故人書來招我歸正
我五疏辭官時七千里外同此意相知貴在
心相知上言契濶久間隔下言鬚髻已斑白
我齒於君長六年那能荒裔長爲客當時兄
弟何振振十年之內餘一身青草湖邊短長
句使我讀之心酸辛異姓弟兄亦數輩只今
屈指幾人在不堪落落若晨星君在湖南我

北塞天山雪深八九尺多年積水色皆碧近
塞無時無虜來枕戈擐甲無寧夕不能行志
自合休不能餬口良可羞丈夫半百尚碌碌
矮簷之下非良謀武陵山桃源洞十宵九宵
常入夢不待楚狂歌衰鳳又寄長相思調一
首云冰滿川雪滿山春風不度玉門關三年
苦戍邊書一船酒一船與君同棹下江南於
今二十年

廷試後身體憊極而病同年中病者甚多

十八日傳臚謝恩名次在三甲後予聞而笑曰得了頭巾債足矣從是日誇官起同鄉大冢宰鄭公少宗伯何公等設席于全楚會館從李文正祠迎往旗幟鮮明幾數百隊通國之人出觀是日龍君御偕崔生受之至予復出城相晤

十九日赴禮部恩榮宴衣冠雜沓殊不成禮也同鄉諸公迎于國公樓

大京兆李公夢白邀飲于魏戚畹園魏極能造

酒有水芝丹沆瀣梧桐等名皆輕清而冽
楊脩齡見召同君御諸公君御訝予不飲不知
予之久戒痛飲也

三月二十三日早至李京兆處別時京兆以副
都御史撫山東行矣且言若選館定當讀書
中秘如不然應作縣令縣令亦可行已意勉
爲之可也予曰予日來多病不如改校官爲
愈耳李曰豈欲追步中郎乎一笑而別是日
赴太學謁先師于階墀大栢樹下換冠帶

二十五日誇官止

君御來宿叅中分韻

采友石見召同君御脩齡諸公命歌兒演新曲
城西淨業寺前湖水晶瑩新荷已點綴水面邀
藩叅侍御龍君御楊脩齡太史馬康莊民部
馬仲良水部李增華國博蕭爾先同飲其右
爲龍泉菴卽予冬間與浙中同年劉德倩求
基西川王君萬任杰嘔心脩業處也

西直門北十餘里地名海淀李戚畹園在焉亭

臺樓閣直入雲霄奇花異艸怪石美箭具備
引玉泉流水入于清渠可數里泛大樓船其
中宛似江南是日脩齡作主詞客龍君御而
下若干人工奕棋書畫者若干人亦一時之
勝會也各分韻號爲爲海淀大會詩

四月初七日午風雨驟至雷電異常抽稅內相
張燁住房爲雷火所焚三十余間頃刻立燼
江陵閩藩理問李太和見召偏覓名戲得沈周
班演武松義俠記中有扮武大郎者舉止語

言曲盡其妙

宣城伯園招客有高樓可望西山

同君御脩齡至西苑度金鰲玉螭橋見西湖之
水澄湛晶熒新蒲翠色冷冷照人宛似江南
其中多道院皆永陵脩真處也樓觀櫺比莫
可悉記望兎兒山洗粧樓皆未及登至清暑
殿登閣窮一城之勝以偶有冠急歸

脩齡將按貴州水部來馬湖斯行爲首公餞之
于泰寧侯園園有山可遠眺惜爲樹所遮下

有小池貯朱魚皆械水也

送同年襄陽王秀嶺還楚以尊人憲副公卒于
滇往迎柩也別于荆南館午後坐同年吳二
卜寓晤汝陽李元鎮年兄出二卷相示一爲
思陵寫李長吉詩思陵宋高宗也筆法學大
王極有結構前失其半後有邢子愿跋一爲
黃平倩過諸葛武侯祠詩極奇拔微有晦語
要之知國脉深遠非世匠所能知也予亦有此
皆劈窠大字寫于松滋署中者惜其中失數

段

聞董太史有回祿之變緣與青衿及居民有小
忿因致結黨肆毒所藏書畫盡爲灰燼亦奇
禍也

重午日飲于同年吳二卜寓去年同二卜泛于
龍湖道及舊事懽甚

送楊脩齡按貴州憇于報國寺松下喬松五株
參天入雲掬枝曲幹鵲峙鸞翔大都宋元以
前物也送客皆蔭其下

西寧侯宋膺符名光夏見召同君御君御與其
尊人爲詩壇友也

劉特倩王君萬見召于龍泉庵其地爲三人脩
業處也追思三人相對苦思光景堪爲墮淚
或文思不屬相牽走水上望西山黛色頃之
入黑山鬼窟中見如不見矣

同龍君御米友石飯于長春寺寺在順城門外
斜塔看演曇華記

得楊脩齡書畧云良鄉道中取道房山遊上方

小西天上方山甚溪幽非復人境徑路盤紆
石磴直穿雲表道傍多磐石可坐而樹木扶
疎枝枝葉葉恰相隱映可當行人笠蓋如聖
泉菴一斗泉皆週遭絕壁中闢一洞天真可
避世小西天在山半懸巖爲靜琬師藏經處
貯四大部石經經凡七洞閉不可開而其外
間碑刻如金剛等經猶是貞觀以前物雷音
寺便是一大石室中坐佛像四面牆壁皆經
筆法遒古殆過于聖教序登高騁望洞壑幽

奇峯巒峭舊無遠不見下有東西二峪寺西
峪之泉瀉注僧厨下澄泓清澈涓涓不已流
爲大河有稻田水磨氣象彷彿江南此地去
涿州四十餘里卽客路甚忙何容過而不問
惜風塵行役不能久留猶是一恨予讀此游
興勃勃

宛上吳戶部福生名伯與以燈市賦來陳無異
來問如何可以死得予曰心死則可以死矣
阜城關外錢公園赴膳司葉明原諸公召園有

荷池蔬圃布格分畦整甚

從手帷第中發入西山避暑過極樂寺小憩松
樹下至西湖見十里荷花香風撲鼻止玉泉
山下裂帛湖邊史金吾園園有竹樹有小亭
瞰泉卽裂帛之源也源出石根中泠泠然作
微籟石一壁骨理亦遒勁緣竹徑登山有亭
可望原隰有洞沁涼晚步裂帛泉畔讀碑卽
古昭化寺也今荒蕪園右爲華嚴寺止有華
嚴洞山之爲洞者五皆如浮屋可住予十六

年前曾遊此今地輟葱菁

早往西山過鮑家寺整麗甚松覆一墀過翠巖
寺息于中峯菴菴中望都城若在几席此中
石墻石徑石樓皆鮮淨如新浣者

六月初一日暑甚息于中峯菴菴下有帝王廟
正德間一中貴人造感世人事浮屠而矯之
者也其志亦近正然予謂帝王自有朝廷
崇祀之典私祠之適成其褻不知西山自有
闕典卽不祠浮屠亦未始無可祠者特人不

讀書耳按漢王氏有五侯乃譚商立根逢時也五侯中王譚實爲貞臣譚雖封侯而不肯事王鳳水經注王譚不同王莽之政子興生五子竝避時亂隱居涿郡西山光武卽位封爲五侯元才北平侯益才安喜侯顯才蒲陰侯仲才新市侯季才爲唐侯所謂中山之五王也此五侯以貞節封比前之五侯清濁不同矣本傳譚倨不肯事鳳不輔政而薨子仁嗣仁素剛王莽內憚之令人奏就國後遣使

迫守令自殺是不同王莽之政者譚之後又
有子仁所云興者豈卽仁之弟耶因兄死而
相率避亂正相因也惟仁受王莽之誅而後
光武義而封其後然則譚抗王鳳仁抗王莽
興子五人竝能沉冥飄然遠去是譚之一門
父子祖孫忠貞大節不亦卓然名臣也哉夫
五王俱以高隱居西山則西山以五王重矣
此山正舊無古跡有如此懿美之跡而志不
知採又五王俱有忠義大節法宜祠舊禮官

不以上聞皆固陋甚矣若以此廟爲西山五
王祠極妥

游香山寺門徑博大喬木遮天流泉界道依山
汚隆以爲殿堂寺左來青軒如廣袖忽開盡
見原隰寺後爲一中貴墓石路淨潔菓松列
植所望比來青更遠已還故道出寺不數里
至洪光寺寺有磴道十餘盤每盤里餘翠栢
列植日中踏影而上入寺小坐煮茗不數里
爲碧雲寺入門聞流水聲過僧室齋廚與泉

相接其最後石根岈岈出泉繞亭而出匯于
方池池種白蓮觀其素質清渠便覺紅蓮未
能免俗池上有翠竹一方以嬌穉倍益其妍
竹前銀杏一株可數十圍

又數里爲臥佛寺寺在溪山中有娑羅樹二株
其旁柯皆爲他山喬木生平見樹無大于此
者寺西有奇石一具色如碧玉下瞰泉池遡
泉行源極遠旁多美箭宛似江南泉最空養
花故僧舍多爲中貴所據千畦萬畛奇花畢

萃焉山後有老僧亦以養花自給以其餘施
往來行脚留齋甚豐潔已至娑羅樹下候日
落而歸當全遼之時此寺號爲巨剎中可容
千萬軍卒去今門頭村可十里卽此寺之門
也則其大可知

住中峯菴左有亭可望都城如在几席前薰風
大至坐而忘暑

須日華水部招至淨業看荷花時荷已盛開
于君御處見一老人姓王號玉峯云百餘歲其

貌若四十許人見蘇子瞻所畫偃松及親筆
贊黃山谷贈了元長老詩與周彥者後跋極
多有耶律楚材姚少師諸人筆楚材書極有
法

晚同君御至王大理斗湟處見外國所畫白衣
大士一軸手中捧一嬰兒渾如活者直不解
語耳

再至淨業寺飯伊蒲看荷花

孝廉劉百世邀看荷花以小舟泛湖穿花中濃

香襲人都城中泛舟之樂當自吾輩始以小
舟過東峯憇苗孝廉園月上後還劉園清坐
新製一布帳置淨業寺前看荷月色晶明聽童
子按拍高歌隔岸遊人亦以歌相答夜遂宿
焉

俞容自邀至淨業看荷花

將有考館之命赴吏部過堂閒步至右堂火房
前見紫藤二架大可四圍虬枝矯矯乃吳文
定公匏菴手植藤也內有一記係馮宗伯琢

菴筆

偶見順天乙卯賢書有酒應星姓名酒姓始見
于此又京師有姓茶者

宛陵吳師每招飲于徐公園園後瞰平湖有臺
可登眺望湖中千頃荷花香風襲人臺周遭
皆喬木蟬聲鼎沸時秋漸深微有寒色予以
他冗先歸覺戀戀不能捨也

七夕與宛陵吳師每同赴米友石海淀園京師
爲園所艱者水耳此處獨饒水樓閣皆凌水

上如畫舫蓮花最盛芳艷消魂有樓可望西
山秀色

楊公都尉名春元卒楊公天性至孝居喪一依
古禮三年惟食菜羹至是以請母祭葬不得
抑鬱而死蓋死于孝也得年三十六予計偕
時住其別舍且盡館穀之禮恒語人曰袁公
名士不可不晤其相知如此

送客至李戚畹園頗多奇花美石惜布置大整
分行作隊少自然之趣耳有小池種白蓮後

有高槐置亭其上憶庚戌與中郎同游此今
七年矣

蕭庫郎大茹邀至延壽寺禮佛寺去都門三十
里極爲整麗有閣可眺遠大茹有子年三四
歲卽喜坐禪自發願願造丈六金身佛從兒
時逐處募緣大內爲出金錢至九歲而殤
佛像至今始成像甚端嚴將載入楚同往者
爲袁戶部滄嶼

同諸公送阮集之行于報國寺再見寺松陡健

清人肌骨是日微雨飲于陳無異宅偕者爲
江陰尹中書澹如漢陽蕭博士象林無異庖
事甚精譚頗洽是夜月甚朗予得移几就斜
月之句午夜同象林歸輿中看月

八月十三日晚以習儀朝天宮宿同年當塗曹
元甫信陽李元鎮寓日已西登顯靈宮閣望
西山微有嵐氣隱蔽予曰近山翻作遠山看
也步古栢下許時飲羽士室有兩銀杏樹參
天直上予曰所以不能如松者松有力此却

王
卷之二十一
欠健耳

十四日黎明同曹元甫瞿起田習儀朝天宮始
見冠裳珮玉之盛是夜月色如晝赴同年鍾
伯敬席回與崔汪二子步月射所追思伯脩
居史館時每月明之夜則同黃陶諸人譙笑
其中予亦偕焉今寂寂惟見風柯鳥語而已
中秋前府叅軍張季公邀看月數杯後步至棋
盤街聽吳兒分曹徵歌并逢同年黃錢諸丈
至四漏始歸

以送盧中秘令子之殯同張季公出平則門憇
于雙林僧舍寺有菓松并婆羅樹皆蕭蕭有
清致已過高梁水至極樂寺寺宏渙整潔寂
寂不見一人坐國花堂張與偕來汪生對奕
予登三層樓望西山寺西樹色參天從杪上
看山色再數年樹愈長當不復見山色矣齋
後步流水邊放爆竹數枚而歸

十七日朝賀 萬壽

上在位四十四年春秋五十四矣

晤黃慎軒先生弟黃縝軒得慎軒文集訊慎軒
病中事云初持齋戒後以病奉尊人命微食
酒肉至于妾媵則終身未寘也初慎軒中郎
與予共脩蓮社之業遂欲棄去筆研故予庚
子以後詩文俱不存稿慎軒亦然惟中郎曰
慧業文人學道豈可盡廢文字卽有之亦係
秀媚精進故常加哀集稿獨全今日見慎軒
集十無五六存者乃知中郎所見甚老成也
茅師以假歸同門等送之潞河友人鍾伯敬以

考選候

旨歸舟亦次路河予登舟晤之望
清流白沙不能無鳬舟之思也

上久俞考選中秘之命而催者緩其事候考者
皆散去予以居諸之難亦思南歸于九月初
三日往部中給假

重九日辰至教場看武試校射歸飯龍泉菴敗
荷清水蕭然有洞庭木脫之想

故鄉人至聞禪友寶方圓公示寂萬曆庚子中
郎南歸覓一道侶于無迹迹公曰有門人圓

象雖無顙悟却是本分脩行僧中郎曰得此足矣遂偕之而南會公安二聖寺有藏經樓共議以此爲接待堂而命寶方主之十餘年來諸方往衡山者皆于此憇息兩殮一宿極有次第中郎家居六載高臥柳浪恒與之俱至山游無論遠近寶方皆從中郎去世寶方哭之甚痛至是以公安藏經殘缺補葺甚難遂至秣陵請一南藏凡半年藏成遂歸不數月而卒嗟乎予之友朋兄弟凋落已甚今方

外又失此友寂寞可嘆

九月廿一日同同年曹元甫李元鎮辭朝明月
在地霜風甚勁頃之初日上觚稜矣是日辭
部

抄黃慎軒太史集完慎軒詩文頗多散佚存者
止此十失五六再當搜尋使爲完璧大都此
老醉心祖道有所撰述例不存稿然至今與
人一札數語皆有佳趣天地至寶豈可聽其
湮滅

九月二十六日從都門發歸興頗濃

良鄉南二十里有豆店訛爲舊店按此地以有
寶建德故城因名豆舊皆非也

黃帝與蚩尤戰于涿鹿乃今保安州涿鹿山非
涿州也

保定西山卽松山榔山也山極穎秀

新樂縣北二十里爲明月店古柳夾道綠暗郊
垌

定州北三十里爲清風店李獻吉詩朝廷旣失

紫荆關吾民豈保清風店又云清風店南逢
父老告我乙巳年間事店北猶存古戰場遺
鏃尚帶勤王字卽此地也石亨于此敗虜虜
痛哭由紫荆關出

由真定迂道走晉州晤社友李素心素心少時
與中郎及予三人共硯席若兄弟然三人幸
皆列賢書素心高才博學以久不第屈就此
官予走晤之見其新政整飭爲之喜

晉州城外卽滹沱河夏來流水震撼城郭

邢臺有泉亦名百泉皆珠串上沸其水可灌數
縣之田或曰濟水伏流而見于此者也濟水
出王屋王屋去此不遠其中出魚甚美

沙河一望皆沙北風大起白日無光江南遊人
每經此輒慘然有鄉關之想

沙河有宋廣平碑顏真卿筆按蘇子瞻稱宋廣
平鐵心石腸而作梅花賦清便得徐庾體予
考碑所載廣平蓋詠諧之士風流曠達者也
其爲梅花賦也固宜近洛關一碑上大書十

丈蓮花數字皆用關尹子云真人遊于十丈蓮花之上事耳

渡洛水甚清澈水上有近山如笠子相接其後則皆坦迤之山澹澹漠漠極有致

從邯鄲至成安渡漳水

從成安止魏縣渡洹水沃野千里想見當日魏博之雄至大名晤陶不退寘酒晚香亭亭名用韓魏公詩中語也

過濬縣縣令焦涵一中郎秦中主試門生也邀

遊浮丘山山據城其前爲大伾若博山鑪後
爲衛河一縷晶熒繞山後而出山園主人爲
同年朱舜年新令滕縣

登大伾山卽禹貢北過大伾處也黃河徙而入
淮故道久湮今河岸污隆之象尤可想見山
一峯最高刻爲石佛往有閣覆之今廢石壁
上宋元人題字鐫刻甚多蓋名人艤舟登臨
之所揮灑也左有龍洞能興雲雨此山亦名
黎陽李密黎陽倉在焉

端木賜濬縣人今墓在大伾山一統志載之衛
輝宜改

訪王威寧伯子孫尚有存者或云威寧不歿出
遊人間似有可信

鄭州過京水鄭舊有京地卽京城大叔之所居
也

裴相公墓在鄭州林錦村舊碣尚存蓋卒于洛
陽而葬于此地者也

近新鄭有土城蜿蜒縣北中斷如一門意卽鄭

之長城也當時列國皆有長城不始于秦

登魯姑土洞之顛可望陘山及大隗山前臨潁水可亭

去新鄭縣南三十里爲陘山舖陘山上卽子產之墓也西有大隗山黃帝避暑處也陘山如眠象峯有巉巉之石大隗峯巒霧接其山深莫可測也此處正可爲關

禹州城西自重崗下忽爲平疇雲林霧樹宛似江南揚戶部文弱以入京至共晤于曹純原

憲副席上文弱將遊嵩少甫揖卽云嵩少有緣得同往矣後訊之曹公曰嵩少去此尚三百里興始阻予時思歸甚曰青女至矣兄且急急渡河文弱始有止意

出禹州見西山坦迤

宿襄城殊有酒况飲襄陵酒甚甘而辛微有藥氣

渡汝水或云出天息出高陵出大孟出燕泉其實出堯山堯山卽今伏牛山也記注云巖障

溪肩山岫邃密石徑崎嶇人跡裁交分明畫
出近日伏牛光景

葉縣唐屬北澧州大曆間爲仙州又置仙鳧縣
葉縣北十里臥羊山山石若羣羊又有荆山俱
魁父丘耳

葉縣北澧水名沙河渡水源出汝陽大孟山與
汝水同源世祖破王尋兵澧水爲之不流處
也上有汝墳店墳亦作瀆謂之大瀆水爾雅
曰河有雍汝有瀆瀆卽汝之支流也

渡湛水春秋楚公子格與晉師戰于湛坂卽此地也入于汝

葉縣北十里有問津舖按汝水東爲葉縣溺車灣是先聖問津處此非也

葉縣南關外卽昆水縣所由名也源出西唐山流逕昆陽城南入于汝西唐山亦名青山

渡燒車河水經注云醴水又逕其城東與燒車水合水源出苦菜山入汝卽漢兵燒王莽輜重處也

渡葉縣澧水按楚秦皆有澧水楚澧水不出衡山而云澧出衡山者以葉澧出雒衡之山故耳至秦之澧音豐不音里澧出南山豐谷北人謂周都鄠邑以澧得名通作豐詩維豐之垣書王來自商至于豐澧從山挂澧從曲

葉黃城山卽方城山按方城卽楚之長城也亘數千里黃城乃方城舊牆基也水經注甚明葉縣有諸葛武侯廟在平山下西南前朝斷碣尚存蓋諸葛先人從瑯琊遷于此地者也武

侯雖遷居襄陽而不忘其所自始故曰躬耕
南陽葉南陽屬也

次襄陽弔同年王繡嶺尊人爲留一日憇于春
酒亭初予過此繡嶺同步至漢上一別墅語
予曰老父宦滇早晚歸來當爲遊息之所幸
爲我取一亭名予曰春酒一用春酒介眉壽
之意一以此地近漢水用李白此江若變作
春酒句也繡嶺然之及繡嶺與予同成進士
其尊人卒于滇繡嶺以艱先歸至是再過春

酒亭已爲安厝黃腸之所矣

謝公巖巖色極奇古蒼藤下覆壁上有趙清老
祭將士文皆完好

習家池水極佳山稍童鳳凰臺望漢上清水白
沙綠樹如城

鹿門山重嶂包羅極其宛邃信隱者之居也纔
入寺禮佛卽聞泉聲久之愈洪至時已暮急
取火覓泉泉卽在殿後噴珠跳玉窮其源凡
七疊而下是日以小舟從鳳凰臺往遊偕者

爲蔡榔石余溶之有小伶二人願從詢之乞
字扇耳笑而許之時十一月初二日登鹿門
半山看山色山雖重阻殊覺坦迤登舟至蔡
家嘴卽蔡洲也飯潼口止宜城

初入宜城卽愁雨至是未至淝陽數里雨卽大
至予往返此中數十次矣未見天霽日也

過斑竹鋪按江陵記曰州城五十里有斑竹崗
楚平王墓在焉唐詩送人至江陵云斑竹岡
前山雨暗此地去今江陵二百餘里恐亦迷

其迹矣

住荆門雨雪大至赴人召後日已晡予終不能
忘惠蒙泉往視之泉注爲池四周作方渠渠
外圍以短墻時盛寒泉出氣如沸湯此水出
馬良河入于漢晤雪里弟弟時署州學值有
鼓盆之變不共晤言

十一月初九日雨稍止予足馬從澧陽至龍陂
橋中外親友迎者皆至止于城外郵亭

十三日渡江歸公安

予念髫年大人卽屬望以登第大人卽世予方
抱病頗有性命之憂此事已付之流水矣幸
病漸痊入場復得一第今給假歸來上丘墓
爲首務羊豕酒脯備極豐腆抵家四日卽入
鄉

二十日祭先塋歸于喬木堂與里中諸叔伯兄
弟及侄子輩飲神福酒五弟携有歌兒一部
絲肉交奏歡笑如雷

亡兄中郎之塋在刀環里去長安村五十里二

十一往祭毛太初姊丈所居甚近夜往宿焉
予同母四人一女兄今惟女兄與予在耳予
謂從人頗多恐煩大姊太初曰里中饒米肉
但患人少不患人多也遂爲之留一日而去
從肉浦發天色寒甚牛頭里門人田明之學謨
邀飲日已西予騎馬走三穴橋燔于野郵抵
邑中已二漏往返共五日此五日中午幸而無
雨

里中親友稱賀自此月二十三日始幾同酒食

地獄

兩弟四侄等皆以予歸擊鮮過從爲歡微傷華侈予曰昔東京楊袁皆爲大族袁氏微汰爲史所譏我輩當共守素業可也

予自病後不喜夜飲每赴召必以午餐後卽戒七箸非獨學作清淨道人亦老年節嗇之道宜爾

臘八日以諸伶裝百戲舞狻猊導齋供供佛及二聖如來通國之人出觀

十二日以舟入江陵泊于黃壇復見舊日水宿
煙棲光景

住承天寺僧舍上有蘭茁其芽四字予舊所題
也此地爲羅君章舊署額名叢蘭予故爲題
此字按君章宦此時凡三遷初居城中遷于
城外又遷于百里洲此必其官署處也

赴江陵李大令席于仲宣樓舊傳此地名望沙
樓陳堯佐改今名樓宜在襄陽不宜在此然
仲宣樓在江陵唐人詩多有之此地又有襄

陽樓見元微之集

沅洲王孫齋中竹石蕭爽出新得黃荃花鳥卷
卽予去歲見于翠軒王孫處者展玩一過更
覺清妍并爲作跋

有僧法幢年二十餘不知何許人眉目娟好亦
知學詩爲惡友所引飲酒食肉逾年遂抱重
恙來見予予爲處居諸之費并約其下公安
至寶方延壽堂將息

山人張無美鄂人少爲僧名秋水後冠簪稱遊

客病臥承天寺予爲處居諸之費

祈年以補廩入省爲作書寄鄂中故人
二十七日還公安度歲

珂雪堂外集卷之十一

終